

# Partir – laschar encrescher – turnar a chasa

Museum local Vaz

■ (cp) Il destin dals schuobacheclers grischuns vegn sclerì ils 22 da mars a Vaz-Zorten. Represchentaziuns d'in chor d'uffants, in referat areguard «Kinderarbeit fern der Heimat» e la preschentaziun dal nov guid da viandar «Schwab-


benkinder-Wege Schweiz und Liechtenstein» porschan invistas multifaras en quest chapitel impressiuant da l'istorgia dal Grischun. Causa povradad e l'endirar fom stuevan creschids ed uffants da regiuns alpinas sa render en il 19avel

tschiantaner en la regiun al nord dal Lai da Constanza per chattar là lavur e paun. Era da las valladas grischunas viagiavan els en il Schuob tar «fieras d'uffants» nua ch'els vegnevan intermediads a purs da la regiun. En numerus dals cas pudevan ils uffants sin ils bains sentir in tractament raschunaivel, blers vegnivan dentant unfrendas d'arbitrariadad e da violenza.

Chanzuns che raquantan dal partir, dal laschar encrescher e dal turnar a chasa interpretescha la Singschule Chur a Zorten. Las «chanzunettas» da Robert Cantieni derivan or da l'archiv da famiglia dal cumponist e vegnan per part preschentadas per l'emprima giada. Ils chors d'uffants chantan er il «Schwabengänglied», il sulet fastiz auditiv tradiziunal or dal temp dals schuobacheclers.

Tar il tema «Schwabengänger – Kinderarbeit fern der Heimat» referescha *Loretta Seglias*. L'istorica sa faschenta en sias lavurs da perscrutaziun cun l'istorgia sociala da la Svizra, en spezial cun la situaziun dals schuobacheclers e dals uffants plazzads. Ella è actualmain ina da las enconuschentas expertas sin quest sector.

Ses nov guid da viandar «Schwabenkinder-Wege Schweiz-Liechtenstein» preschenta *Elmar Bereuter*. L'autur prenda cun sai ils lecturs sin in impressiuant viadi en il temp tranter povradad, desperaziun e speranza. Viandond sin ils fastizs dals schuobacheclers intervegn'ins dapli davart las cundiziuns da viver da lez temp ed ins survegn il medem mument novas invistas en las regiuns d'origin dals schuobacheclers.



Ena foto tgi mossa en mattatsch tgi geva agl Svob.

**Occurrenza: Vaz-Zorten: Sonda, 22 da mars 2014, 16.30, chasa da scola Zorten**  
**Entrada libra/collecta/aperitiv**  
**Il Museum local Vaz è aviart da las 13.30-16.00**